

四庫全書

經部

欽定四庫全書

經部

四書蒙引卷十三

詳校官給事中臣戴璐

刑部郎中臣許兆椿覆勘

總校官編修臣倉聖脈

校對官中書臣葉蘭

騰錄監生臣左熙世

欽定四庫全書

四書蒙引卷十三

明 蔡清 撰

萬章章句止

萬章問曰舜往於田

章句一條減十八字

仁覆閔下謂之旻天註此不知何所本詳考之覆覆
疇也閔閔恤也謂仁以覆閔乎下也此以天之情言
爾雅曰春為蒼天夏為昊天秋為旻天冬為上天
於春言色於夏言氣於秋言情於冬言位相備也

怨慕也 芟二條減四十六字畧更次序

怨慕謂怨已之不得其親而思慕之必欲得其親而後已也正所謂惟順於父母可以解憂 怨慕二字相因怨在已則所慕在親矣若怨親則無慕焉故新安之說未盡然也 萬章謂然則舜怨乎蓋未達孟子之言怨者為怨已而誤以為怨親孟子答言舜不能不怨處所以發明其心者直在父母之不我愛於我何哉一句見得所怨非怨父母也

夫公明高以孝子之心條減一百六字首條湊合

夫公明高以孝子之心為不若是恕我竭力耕田共
為子職而已矣作一氣讀下此與下句一正一反說
當云夫公明高以孝子之心既不得乎親則必不能
若是其愬然不介懷以為我止知竭力耕田以共子
職而已矣孝子之心正以謂父母之不我愛於我果
何罪以致之此其所以怨慕耳 於我何哉者負罪
引慝時自思惟其所以得罪於親之故而不可得皇

皇無措而不容釋者也最得大舜怨慕之情狀

帝使其子九男二女條

帝使其子九男二女百官牛羊倉廩備以事舜於畝
畝之中一也天下之士多就之者二也舜將胥天下
而遷之焉三也此三段作一類看正下文所謂人悅
之好色富貴者所謂富貴即帝將胥天下而遷之人
悅即所謂天下之士多就之者妻帝之二女便是二
女事之至於百官九男倉廩則又在所畧蓋古聖賢

說話正不必如此之拘拘於湊合然大意則是如此
此條正承上文言舜之怨慕有如此也下條則又推
其心以解之

帝將胥天下而遷之焉

減四十五字移一條入五十題下

胥相視也註謂與之共視乎天下而遂移以與之也
胥正訓相即共也視字是足他意堯老而舜攝政分
明是與舜共天下遷之則盡轉而付之

天下之士悅之人之所欲也條

上條帝使其子至如窮人無所歸是以其迹言此則
以其心言也帝使其子九男二女百官牛羊倉廩備
以事舜於畝畝之中天下之士多就之者帝將胥天
下而遷之焉而舜乃為不順於父母如窮人無所歸
者何也誠以舜之心以此數者皆不足解憂而惟順
於父母可以解憂也故孟子推舜之心如此以解上
文之意

人少則慕父母

條

上言舜不以得衆人之所欲為己樂而以不順乎親之心為己憂此則因贊其異於衆人如此也

五十而慕

芟二條減三十四字首條出帝將題下

五十而慕非怨慕也蓋瞽瞍未底豫之前舜之慕乃所謂父母惡之勞而不怨也既底豫之後舜之慕乃所謂父母愛之喜而不忘也 註五十而慕則其終身慕可知矣言非止慕到五十而止也然孟子乃止謂五十而慕何與蓋主父母生存而言耳然舜既五

十而慕則事死如事生之念豈容自減耶故曰終身慕可知 按書經舜方側微四岳舉舜曰瞽子父頑母嚚象傲克諧以孝烝烝乂不格姦帝則釐降二女于媯汭蓋是時瞽瞍已底豫矣又何嘗有不告而娶之事又何嘗有帝將胥天下而遷之為不順於父母如窮人無所歸之事且既不能安受堯之天下而獨安受九男二女百官牛羊倉廩之奉哉孟子疑於費辭而枉辯矣 按孟子議論如此使孔子得賓師之

位而孟子佐之其所擬議以進於孔子者必有為孔子所損益折衷而未必惟言是從也

萬章曰詩云娶妻如之何章芟四條減二十三字

齊風南山之詩云娶妻如之何理當告於父母然誠如此詩之言則能盡此理者宜莫如舜舜乃不告而娶何也孟子答之若曰告而後娶者理之常也而舜之所處則人倫之變也告則為父母所沮而不得娶矣夫娶而男女居室者人之大倫不可廢也如告而

不得娶則廢人之大倫而不免見懟於父母也與其
告而廢大倫以懟父母孰若以權行之既免於廢大
倫且不至懟父母是亦所以為孝而已是以寧不告
也 以懟父母非子怨父母也如告則不果娶亦徒
為父母所仇怨耳 一則曰舜不告而娶為無後也
又一則曰如告則廢人之大倫豈以不廢大倫正以
為繼嗣耶

帝之妻舜而不告何也

減一百六十字

意謂帝以女妻其人亦當使其人之父母知也 曰
帝亦知告焉則不得娶也依吳氏程作一句讀言帝
若告其父母則舜之父母必不喜其娶而有違言矣
父母之違言一出則舜便不敢就而帝亦難強之矣
程子謂以君治之是兼謂舜與瞽瞍非專指瞽瞍
也 按黃氏日抄史記載堯妻舜之後瞽瞍欲殺舜
古史非之本尚書瞽瞍亦允若堯聞之然後舉而妻
之於理為勝足以洗百姓之疑然則萬章之問孟子

之論似皆贅矣愚每疑舜當無不告而娶之事

鬱陶思君爾忸怩

鬱陶思君爾一句忸怩一句言思君之甚故來見也

雖如此云終不免於忸怩

舜曰惟茲臣庶汝其于予治

移半條入下題

此則不可信舜既為天子而封之有庠尚且使吏治其國豈以帝堯托其臣庶乃轉以托其不肖弟耶而孟子乃不辯其非且從而筆之書明曰象憂亦憂象

喜亦喜若真有此事者竊疑此處亦欠精細

奚而不知也止象喜亦喜芟一條減六字

言舜雖知象之將殺已然見其來而喜則又有不自覺者象憂亦憂句是伴象喜亦喜說重在下句觀本註言舜見其來而喜一句亦可見本註既曰萬

章所言其有無不可知又曰然舜之心則孟子有以知之矣下句正與上句相應言若果有此事舜亦終不以為恨所謂象憂亦憂象喜亦喜兄弟之情自有

不能已者矣

曰然則舜偽喜者與

減七十一字

孟子雖告萬章以象憂亦憂象喜亦喜然萬章猶未
達此二句是言其兄弟之情自有不能已者猶謂只
是作意為之耳

故君子可欺以其方難罔以非其道

減五十二字

故君子可欺以其方泛說而子產事在其中言子產
令校人放魚校人復之云云一自理之所有者子產

安得不信 本註象以愛兄之道來所謂欺之以其方也舜本不知其偽故實喜之何偽之有此數句最緊要其不知其偽者愛弟之心勝而然也不然明洞秋毫豈容有不知哉

故誠信而喜之奚偽焉

不要將信字帶誠字信字與喜字相連謂真實信之喜之也 信之所謂舜本不知其偽者也本註只謂故實喜之者惟實信之故實喜之不信則不喜單言

喜自該得信也

萬章問曰象日以殺舜為事

章減十字

象日以殺舜為事此見其為舜之深仇世之大惡而舜既為天子所宜以為誅首也而乃只放之何與

萬章曰舜流共工于幽州

止

殛鯀于羽山

芟二條

幽州北裔崇山南裔三危西裔羽山東裔 所謂投

諸四裔迸諸四夷者 州書作洲 殺三苗與書不

同書竄三苗 殛鯀書傳曰殛則拘囚困苦之此解

曰誅也 宋太祖曰堯舜之世四凶之罪止於投竄
何近代法網之密耶然則曰殺曰誅孟子之雄才所
畧耶 殺三苗於三危當依書作竄三苗蓋三苗卒
死於此故孟子云殺也殺者殺其君也鯀之殛初亦
只是貶逐而禁錮之此曰殛誅也其致一也程子遺
書云殛死猶言貶死耳

四罪而天下咸服

減五字

罪活字猶云誅也服書傳曰服其用刑之當罪也即

下文誅不仁也 仁人固如是乎一句帶下不帶上
正所謂在他人則誅之在弟則封之者也然事實亦
只在上文

不藏怒焉不宿怨焉

不可謂雖有怒而不藏其怒雖有怨而不宿其怨仁
人之於弟也雖可怒而不怒雖可怨而不怨直是無
怨無怒也然其謂之不藏不宿者亦因萬章之問立
為天子則放之與所謂封之者皆是後來事此不藏

不宿二字所由來也 怨深於怒人之七情有喜怒
又有愛惡 使吏治其國而不得暴彼之民舜當時
盖只托欲常常而見故源源而來之意而行之終不
顯其迹也後人看得分明既著之書則昭昭於萬世
矣

雖然欲常常而見之故源源而來

此又是一轉語舜之封象時使吏治其國而納其貢
稅則既不失吾親愛之心而被亦不得虐有庠之民

矣然舜之意猶有在也舜之於弟其親愛之無已欲
常常而見乎象今既有吏代之治其國則象得以源
源而來見於舜矣向使以國事煩象則象不得以源
源而來舜不得常常而見之矣故古云諸侯之來見
必俟朝貢之期今舜之於象不待諸侯朝貢之期而
以政事接見於有庠之君者此之謂也此之謂正以
其欲常常而見之故源源而來也引此以證源源而
來之意見其親愛無已如此也 以政接於有庠謂

舜見諸侯則釋其政事而見之蓋是朝貢之期也今
舜見象之頻不待釋其政事以見之見其源源而來
也 合朱註及吳氏之說觀之蓋象至不仁處之如
此則既不失親愛之心者不以公義廢私恩也使彼
亦不得虐有庠之民者亦不以私恩害公義也不以
公義廢私恩者仁之至也不以私恩害公義者義之
盡也然不徒曰仁而曰仁之至不徒曰義而曰義之
盡者以其處人倫之變而能不失其常也

咸丘蒙問曰

章莛一條第三條首一句舊脫今補

自語云盛德之士至天下殆哉皆咸丘蒙所引語所謂齊東野人之語也 盛德之士君不得而臣父不得而子此三句又是齊東野人所舉者欲為下文責舜張本也此語本意云盛德之士其為臣也君亦不得以不善及之其為子也父亦不得以不善及之正下文所謂祇載見瞽瞍夔夔齊粟瞽瞍亦允若是為父不得而子也 為吾君者吾不得以為吾臣為吾

父者吾不得以為吾子舜南面而立堯帥諸侯北面而朝之則是君而臣矣瞽瞍亦北面而朝之則是父而子矣且舜見瞽瞍其容有威孔子曰於斯時也天下殆哉岌岌乎為此語者亦都是說舜不是但實無此事也

舜南面而立

減五十二字

古禮於朝則王與羣臣皆立無獨坐於燕則皆坐無獨立者堯帥諸侯北面而朝之之說蓋燕子之

徒也燕噲實反朝於子之事見綱目蓋邪說暴行二者相連有暴行必有邪說以倡之 獨言舜見瞽瞍其容有感則為此語者意以父子天性尤所不能安也故畧堯

天下殆哉岌岌乎

減三十五字補題一句

本註言人倫乖亂天下將危兼君臣父子言 不識此語誠然乎哉補首句語云與末句此語之語正同或云不必泥盛德之士三句是齊東野人所引者曰

如此則下文孟子所引是為父不得而子者亦何所據耶看來此三句還是古語但齊人錯認做別說耳至若二語字終同也齊東野人之語也此一句只是斥其非君子之言耳不必以為實然也

堯老而舜攝也

此一句最有力言堯在時舜未嘗即天子位也又引堯典及孔子之言以證之明其無是事也

舜既為天子矣又帥天下止二天子矣

減三十字

言堯未死舜既為天子即是無堯為君矣今又帥天下諸侯為堯三年喪是又以天子待堯豈不是二天子此數句是據堯典事實言之而以孔子民無二王之語斷之直是辨折得倒然都就無臣堯說惟此事有證據在而其無臣父之理亦可并見矣咸丘蒙猶未喻故又有下文之疑

普天之下莫非王土

言莫非王臣便是了必先莫非王土者見居吾土者

便是吾屬也所謂尺地莫非其有一民莫非其臣
率土之濱率循也環也循土之濱是環海之內也土
之濱便是海矣

不以文害辭止為得之

芟一條移二條入是為父題下

自此章言之則普天之下莫非王土率土之濱莫非
王臣者辭也此莫非王事我獨賢勞者志也詩人之
志在此吾惟以意逆之斯得之矣志與意不同志者
詩人之志也故詩言志意者讀詩者之用意也所謂

意會者也 按此數句不但說詩之法凡讀書之法皆然也

孝子之至莫大乎尊親止以天下養

據此則尊親養親只是一事又曰為天子父尊之至也以天下養養之至也則又分而為二何也蓋孝子之至在於尊親尊親之至在以天下養是孝字虛而尊字實也尊字虛而養字實也然有是居必有是養有其名必有其實故本註曰既為天子之父則當享

天下之養矣尊親以名言養親以事言是疊而為一
固可析而為二亦可也故雙峯饒氏曰尊親養親雖
是二事然尊與養相須養之至乃所以尊之也言
舜既為天子則瞽瞍為天子之父矣瞽瞍既為天子
之父則當享天下之養矣云云此是據理而斷其無
臣父之事

詩曰永言孝思孝思維則此之謂也

減四十三字

此引下武之詩以咏嘆其尊親養親之至也 尊親

養親字面正與使父北面而朝者相反孟子所以為善辯

書曰祇載見瞽瞍止瞽瞍亦允若

祇載句見瞽瞍夔夔齊栗句瞽瞍亦允若通連二句故註云言舜敬事瞽瞍往而見之敬謹如此瞽瞍亦信而順之也

是為父不得而子也

未二條出不以文害辭題下

正在瞽瞍亦允若一句上此是字此也此為字是也

下章吾聞其以堯舜之道要湯未聞以割烹也朱
註云愚謂此語亦猶前章父不得而子之意自堯
老而舜攝也至是二天子矣是說舜無臣堯之理自
普天之下莫非王土至孝思維則此之謂也是說舜
無臣瞽瞍之理至末段引祇載見瞽瞍一條又特證
咸丘蒙所述父不得而子之非亦以見無臣父之理
也獨解父不得而子之說而不及君不得而臣者
瞽瞍實不善堯不可以並論也可說瞽瞍不得以不

善及其子不可說堯不得以不善及其臣聖賢之言
不拘於對股也或舉此以該彼或舉其一以該其餘
又或隨其要重處言之或隨其顯處言之

萬章曰堯以天下與舜有諸

章第三條授字舊作受有誤

萬章曰堯以天下與舜有諸孟子曰否天子不能以
天下與人所答非所問也萬章之問只是下章不傳
子之意耳孟子不直答以其事之有無但言其無此
理天子不能以天下與人破頭一句實然之理正

大之論億萬鈞之力也此章之大指 嘗觀之子噲
嘗授燕國於子之矣然非天之所與國終非其有也
王莽嘗盜漢家之天下矣然非天之所與天下者終
非其有也然則舜之有天下非天與之乎故此章眼
目全在二天字而究其所以為天者則在章末引泰
誓一段

曰否天不言以行與事示之而已矣

減二十三字

體之於身謂之行措諸躬行謂之事若以下文觀之

如使之主祭而百神享之使之主事而事治百姓安
之何處為行何處為事曰此皆事也然莫不自身出
行固在其中矣所謂出乎身而加乎民自其出乎身
言行也自其加乎民言事也 示字最好看天不言
惟示以其意而已言則無所事乎示也正為不言故
只示耳

昔者堯薦舜於天而天受之

堯薦舜於天而天受之其中有行有事暴之於民而

民受之其中亦有行有事如使之主祭其誠敬之心
屬行其所以處夫祭祀之品物虔數則屬事如使之
主事其所以為之主宰本根之地屬行若夫紀綱文
章謹權審量之類則屬事也

使之主祭而百神享之 至末

使之主祭而百神享之 至故曰天子不能以天下與
人其所以發明夫天與舜之意似亦足矣下文又即
其攝位之久與其踐位之際迫於朝覲訟獄謳歌之

歸者言之尤見其出於天與之意要亦上文天受之理也至末又別引泰誓之言以見上文所謂天與者槩自民心所歸言之非天自天而人自人也通章所謂天者亦畧有不同而其歸則一也

舜相堯二十有八載

承上文云不特主祭而百神享主事而事治為足以見其為天之所與自其攝政之久與其迫於朝覲訟獄謳歌之歸者觀之亦足以見其為天之所與也

非人之所能為也天也

此章天字凡十有六惟此一天字不該人故明云非人之所能為也其餘天字大抵皆是天視聽自我民視聽之意此天字以數言其餘天字以理言舜相堯二十有八載所以為天者即下章所謂歷年多施澤於民久而為民心之所歸戴而不忍釋者故曰天也又其下云舜禹益相去久遠其子之賢不肖皆天也非人之所能為也

舜避堯之子於南河之南 減十三字

按舜既受命於文祖且以此類于上帝矣是雖未即真而帝位所屬已定此亦磊磊落落青天白日事也而何以至此時乃避之南河之南耶殆不類聖人舉動豈孟子之過辨與或曰古人崇禮讓如三讓而進似亦頻繁聖人以天位之惟艱而誠心遜避有如此難以時人意度推測 必待三年之喪畢然後敢立者前此百官聽於冢宰故也 朝覲者人臣見君通

謂春秋傳出入三覲周禮特見曰覲 訟獄訟乎獄也 謳歌舜非至舜面前謳歌也只是朝野間詠歌舜之德耳 長聲為歌短聲為謳 故曰天也此天宇非是應上文非人之所能為也天也乃是應舜有天下也孰與之曰天與之皆是天視聽自我民視聽之意

夫然後之中國踐天子位焉

此是對避堯之子於南河之南言

泰誓曰天視自我民視

芟一條

再申天不言以行與事示之而已矣之意以結上文

此之謂也謂泰誓此言即吾所謂舜為人所歸即

為天所與之意也 此章言天有主於民而言者天

與之之類即天視自我民視之謂也亦有對民而言

者如薦之於天暴之於民之類雖有二類然其大意

亦主於天與之間或互言以相發惟非人之所能為

也天也一句似主氣數言亦見舜之有天下非堯所

與其意亦同歸也

萬章問曰人有言至於禹而德衰章

孟子此兩章之辯大意皆同但上章天字除舜相堯
二十有八載非人之所能為也天也一天字外皆歸
於天視聽自我民視聽之意及此章天字却全是天
意之天何也為該舜禹益攝政之久近與其子之賢
不肖言正與上章非人之所能為也天也同乃知其
用意之密也

天與賢則與賢天與子則與子 芟一條減五十一字

此兩句與上章天子不能以天下與人一句皆是據理之極致言之一章之大旨也昔者舜薦禹於天至若堯崩之後不從堯之子而從舜也是言天與賢之事禹薦益於天至吾君之子也是言天與子之事其下條丹朱之不肖至施澤於民久是言天所以與賢者也啓賢能敬承繼禹之道至施澤於民未久是言天所以與子者也蓋皆非人力所為而自為非人力

所致而自至也

丹朱之不肖舜之子亦不肖

芟一條首條出上題

丹朱之不肖舜之子亦不肖天意既趨於與賢舜之
相堯禹之相舜也歷年多施澤於民久天意遂歸於
與賢矣啓賢能敬承繼禹之道天意既趨於與子益
之相禹也歷年少施澤於民未久天意遂歸於與子
矣舜禹益相去久遠兼歷年少二意如其子之賢
不肖例謂歷年久遠之相去也

莫之為而為者天也莫之致而至者命也

芟一條

大註以理言之謂之天自人言之謂之命此理字對人言非對氣數言其實此箇天字正以氣數言也

以主宰而言謂之天以當聽受而言謂之命 為屬天至屬人

故仲尼不有天下

此條謂仲尼之不有天下者天也故益伊尹周公不有天下者孰非天乎故註云孟子因禹益之事歷舉

此下兩條以推明之其伊尹相湯以王於天下及周公之不有天下二段又不過申明繼世以有天下一條故此只云兩條

伊尹相湯以王於天下

芟一條末條便字舊誤作戀

註云此承上文言伊尹不有天下之事至周公則曰此復言周公所以不有天下之意一用事字本文

云

云有實事也一用意字本文只舉大意無實事也可見集註之精密處外丙二年仲壬四年大註雖云

未知孰是然必以趙說居程子之先者蓋太丁未立
不言死則外丙仲壬不言死亦可矣然太丁未立而
死既有子亦不應別立外丙仲壬蓋是時既有世嫡
之義則父死子繼嫡孫當立不應別立也趙氏本生
於程子之前然程子之說出於趙氏之後蓋以折衷
之也惟太甲差長之說或未盡 伊尹放之於桐者
蓋藉天子諒陰百官聽於冢宰之義也非顯然放之
也若顯然放之他日難於復矣雖復君臣之間亦難

為顏伊尹初心豈計不及此乎當時必未忍絕望之向
看他三年之內如何自怨自艾句絕於桐連下讀

周公之不有天下

云云

此大槩言太甲成王之能嗣先業耳施澤於民未久
之意却無也

唐虞禪夏后殷周繼其義一也

一也謂均於聽天命也 其義一也亦有兩說皆天
命也 只以天命為義一說皆奉天命也 又以奉天命

為義大抵加奉字為長義者事之宜也自有事實在大註雖有皆天命也之句然其下更有聖人豈有私意於其間哉一句無私意於其間便是奉天命矣上章與此章言天所以有不同者蓋上章言舜之得天下就人心之歸上說天命順也此章言益之所以不有天下難說以人心不歸益是以只就禹之有賢子兼益之施澤於民未久上說便見得是天之所為而非禹之得私於其子也此其立言安得盡同惟上章

所謂舜相堯二十有八載非人之所能為也天也一天字與此章同又見上章已兼此章之義矣 朱子小註云聞之師曰聖人未嘗有取天下之心也三年喪畢去而避之禮之常事之宜耳其避去也其心惟恐天下之不吾釋也舜禹蓋迫於天命人心之不獲已者若益則求仁而得仁耳 愚按謂聖人未嘗有取天下之心者蓋君子所性大行不加窮居不損信乎其無取天下之心也又曰三年喪畢去而避之禮

之常事之宜者亦誠有理也不然何舜禹益皆必引
避於三年之後哉但謂舜禹益迫於天命人心之不
獲已益則求仁而得仁耳此却未然聖人固未嘗有
取天下之心亦何嘗必避天下而恐為我累哉如此
則夫思天下之民匹夫匹婦不獲若已推而納之溝
中者又獨何心哉蓋聖人之所以始避者正所謂朕
德罔克民弗依恐不足以當天命而避之以聽天命
之所屬耳及天下卒不吾釋則從容而就之亦其當

然耳抑何不得已之有至以益為求仁得仁其未是
何也伯夷以父命為尊伯夷不讓則無父而失仁矣
叔齊以天倫為重叔齊不讓則無兄而失仁矣故其
讓者所以求仁遂其讓者斯得仁矣若益之避與舜
禹之避初無二倘非在相位之日近而啓又賢則益
亦若舜禹之受矣又何不仁之有故其論雖高而以
中庸律之似亦有疑也此蓋亦朱子初年所從者與
萬章曰人有言伊尹以割烹要湯有諸

割烹兼宰割烹調也厨人之事 集註按史記云

而終之曰蓋戰國時有為此說者正以戰國時人謬
為此等議論上誣聖賢以便一己之私耳而非實以
為然者史遷之學雜而闇於道義故信之集註引之
特以證時人之言非孟子以為不然而朱子又引史
記以實其為然也

曰否不然也云 芟一條

否語辭不然則是明曰不是也否如書經都兪吁咈

之類皆語辭也 祿之以天下猶言官之爵之之例

繫馬千駟謂所繫之馬馬必用繫 天下弗顧千

駟弗視舉其至大者言一介不取與舉其至小者言
故註曰無大無細一以道義而不苟也愚謂惟一介
不苟取與故能天下弗顧千駟弗視惟其一介不以
取諸人故能一介不以與人一介不以取諸人猶易
至於一介不以與人則尤難矣然冉子為子華之母
請粟可無與也夫子猶與之釜與之庾蓋聖人寬容

不欲直拒人此則孔子聖之時者也

湯使人以幣聘之

條減五十七字

竊疑伊尹既是樂堯舜之道非但成己而已也便要推以致君而澤民今却云我何以湯之幣聘為哉豈若處畎畝之中由是以樂堯舜之道哉然則堯舜之道可用於畎畝之中耶又曰湯三使人往聘之既而幡然改曰云然則前此伊尹果以隱為高而無意於斯世者邪大抵囂囂然云者以觀湯意之度

否耳若論伊尹堯舜君民之心則自猷畝中誦詩讀書以樂其道時便已炯然於懷矣

天之生斯民也

條減三十七字

予將以斯道覺斯民即堯舜之道而平日間之所樂者堯舜之道既明德便欲新民已之所先覺者此道也所以覺民之未覺者亦此道也

思天下之民匹夫匹婦止未聞以割烹也

芟一條

此數段自相承吾豈若於吾身親見之哉者正有見

於天之生斯民也云云而將以斯道覺斯民耳即伊

尹此言觀之蓋其設心思天下之民匹夫匹婦云云

以上皆是伊尹欲出而正天下處然後繳之曰吾未

聞枉己以正人者况辱己以正天下乎見其無割烹

要湯之理也然則尹果何以致湯之知也蓋以堯舜

之道要湯耳即上文所謂伊尹耕於有莘之野而樂

堯舜之道致湯三使往聘之也當時堯舜往矣尹

必欲天下被堯舜之澤者蓋堯舜之民無一不被其

澤尹之自任欲俾厥后為堯舜則天下之人亦被其澤即是被堯舜之澤矣 其自任以天下之重如此言其志在天下而不在一身之富貴故知其必無割烹要湯之事也自湯使人以幣聘之至此節同是此一意 故就湯而說之以伐夏救民此正是使天下之民匹夫匹婦皆被堯舜之澤便是所謂正天下者也 伊尹之於湯凡五就伐夏救民是以末一就言也故後篇楊氏曰 云 若湯初求伊尹即有伐桀之

心而伊尹遂相之以伐桀是以取天下為心也豈聖
人之心哉

聖人之行不同也或遠或近或去或不去

減二十九字

看四箇或字當作四件遠近以未仕而方出仕者言
去不去以既仕於其國者言

歸潔其身而已矣

減二十九字

歸要歸也若曰可以近則近不可近則遠遁可以止
則止不可止則不去聖人之行不同斷斷乎同一潔

身之不污也如伯夷之清柳下惠之和和與清雖不同終是不污故曰爾焉能挽我哉

吾聞其以堯舜之道止割烹也 芟一條補題三句

詩大雅旱麓有曰豈弟君子干祿豈弟朱傳曰干祿豈弟言干祿之有道也猶曰其爭也君子云爾愚謂伊尹以堯舜之道要湯不亦為干祿愷悌也乎 伊訓曰天誅造攻自牧宮朕載自亳補註云孟子引此以證伐夏救民之事也究其所以則從自任天下之

重上來所以於上文有闕屬蓋伊尹之抱負如此勛業如此割烹要湯必無是事也輔氏一說甚好曰此伊尹所自言於此可見其任重之意則其不肯枉道自污以要君必矣

萬章問曰或謂孔子於衛主癰疽章

於衛主顏讎由條

蓋孔子主於顏讎由彌子之諷子路欲其改主也

孔子進以禮止曰有命

減四十二字

得之而進也進必以禮吾盡其在我者也何也其得
也有命存焉吾何急於進哉不得而退也退必以義
亦盡其在我者也何也其不得也有命存焉吾何難
於退哉故徐氏曰在我者有禮義而已得之不得則
有命存焉

主癰疽與侍人瘠環是無義無命也

減二十五字

若主癰疽則是當退以義而不以義退是無義也命
之不得而不受命焉是無命也此處只消用義字非

是言義以該禮也

遭宋桓司馬止主司城貞子

司馬司城皆是宋之官他國則無宋是王者後故做
天子禮有司馬司城此饒氏說也 新安倪曰宋以
武公諱改司空為司城也

主司城貞子為陳侯周臣 芟二條減一百八字

集註主於司城貞子一句是史記文上帶孔子去至
陳一句不可謂是集註引起下文之句也但貞是宋

大夫今乃云孔子去至陳主於司城貞子時為陳侯
周臣也

吾聞觀近臣以其所為主

二句第三條辨字舊誤

近臣為主者遠臣主於人者也故一曰所為主一曰
所主 此亦即上節而申明之如於衛主顏讎由不
肯主彌子於宋主司城貞子為陳侯周臣便見得君
子小人各從其類矣 此一章孟子辯折萬章之疑
凡三節第一節即孔子之不主彌子而安於義命見

其無主癰疽之理第二節即孔子之當厄難時猶擇所主而見其在齊衛無事之時決無主癰疽之理第三節承上言君子小人各從其類既是孔子必不主癰疽既主癰疽便不足為孔子所以盡上二節之意也

萬章問曰或曰百里奚自鬻於秦

章減二十字

人言其自鬻於秦養牲者之家得五羊之皮而為之食牛註五羊之皮賈身而得者也為之食牛為養牲

者食牛也 要秦穆公不知是如何樣去要按莊周
謂飯牛而牛肥使穆公忘其賤而與之政也

宮之竒諫百里奚不諫

夫諫者是則不諫者非矣不諫者是則諫者非矣然
食人之食者當憂人之憂危而不持焉用彼相固難
道諫者之非若道諫者是不諫者不是則孟子又已
取百里奚矣且夫危邦不入亂邦不居奚也既失之
於前危而不持顛而不扶奚也又失之於後又烏在

其為智且賢哉夫既知不可諫何不早去之秦必待
晉人假道時然後委而去哉此則愚生之不可曉者
深取百里奚正恐虧了宮之竒耳使諫不聽而去如
宮之竒凡兩諫不入然後以其族行豈不得於義哉
大抵百里奚亦只是春秋之智士其所賢亦猶孔
子稱管仲如其仁耳所謂姑取一節者固未暇論其
諫之是非也

知虞公之不可諫而去之秦

云云

芟五條減七十一字

自知虞公之不可諫而去之秦至知穆公之可與有
行也而相之可謂不知乎凡四段當以首一段為主
下三段皆以推明乎此意若曰知虞公之不可諫而
去之秦年已七十曾不知以食牛干秦穆公之為汙
也可謂智乎然而知虞公之將亡而先去之智也不
可諫而不諫智也知穆公之可與有行而相之智也
以百里奚之智如此必知食牛以干主之為汙矣故
曰重在首一段 相秦而顯其君於天下至而謂賢

者為之乎凡兩段則重在下段言奚相秦能顯其君於當時而傳於後世則決是賢矣既是賢者又豈肯自鬻以成其君哉故註云云其賢又如此必不肯自鬻以成其君也 孟子此章之辯蓋奚之當時事實已無可據始得以所聞者而推論其理如此言奚之智有如此者必知自鬻之為非矣其賢又如此則不肯為自鬻之事矣智以所知言賢以所為言 孟子深斥百里奚自鬻之說而又謂百里奚舉於市其辯

云何曰百里奚為人養牛莊周與范氏俱明言之此
不足辯但無干穆公之事耳

萬章章句下

孟子曰伯夷目不視惡色章

聲色說得廣不止女色與淫聲如奢麗侈靡之物亦
惡色又如云惡聲至必反之豈必皆指淫樂此二句
自其己身動為處言也自此以下一節密一節

非其君不事非其民不使

此二句以已對人言

治則進亂則退

此二句以處時言重下句

橫政之所出橫民之所止不忍居也

此三句以所在言

思與鄉人處如以朝衣朝冠坐於塗炭也

此二句又言非特橫政橫民所在不忍居至於鄉人亦不忍居也 鄉人鄉里之常人也 思指伯夷自

思也

當紂之時居北海之濱以待天下之清也

上二句又總證上文之實當紂之世正所謂濁世也
目所接者大抵皆是惡色耳所接者大抵皆是惡聲
君非其君民非其民有亂而無治觀於其朝大抵皆
橫政之所出也觀於其野大抵皆橫民之所止也紂
帥天下以暴天下之能免於為鄉人者能幾邪故獨
退居北海之濱以待天下之清也或以此又另作兩

句說則與亂則退及不忍居意重複而文理俱不順矣

頑夫廉

註頑者無知覺廉者有分辨如何見得是相反對蓋無知覺者貪昧嗜利也故與廉反

懦夫有立志

芟一條

懦不立也

伊尹曰何事非君何使非民

何事非君何使非民述其言也治亦進亂亦進承其
言而狀其行也曰天之生斯民以下皆是言其自任
以天下之重此其所以治亦進而亂亦進者也但本
文其自任以天下之重一句只帶思天下之民以下
與萬章上同然亦一理蓋就其將以斯道覺斯民之
言而見其思天下之民云也

柳下惠不羞汙君不辭小官

進不隱賢不晦其所長也必行其志故繼曰必以其

道夫人幼而學之壯而欲行之姑舍所學以徇人便是隱賢便是枉道

袒裼裸裎芟四條

袒裼露臂裸裎露身 按上篇爾為爾上有故曰字

是抑下惠自言也於爾我方有着落 夷惠皆以聞

其風言伊尹獨不然者新安陳氏曰凡言風者皆道不行於當時而其流風餘韻足以聳動於後世者也朱子亦有此說故下篇百世之師亦只及夷惠若夫

子則太和元氣之運風又不足以盡之矣

孔子之去齊接淅而行

減七字

孔子之去齊清米已將炊亦不待其炊而取米以行
何速如之

去魯曰遲遲吾行也

此蓋因子路趣行曰夫子可以行矣故夫子言此以
曉之非必在路上遲遲也遲遲其行正待微罪而後
行也

去父母國之道也

補題句芟一條

此蓋孟子解辭與去他國之道也相對為類 註舉

此一端以見其久速仕止各當其可一端兼去齊去

魯或泥註專指去齊尤非 伊尹聖之任者也補或

疑伊尹出處合乎孔子而不得為聖之時何也程子

曰終是任底意思在何以言之只看五就桀孔子必

不如此且看他說話也忒喫力也忒着意

孔子之謂集大成

條芟一條減十六字

金聲而玉振之玉指磬磬是石然其石甚細且有異
聲亦玉類也故謂之玉 簫韶九成註書傳古文作
箭舞者所執之物說文云樂名箭韶季札觀周樂見
舞韶箭者則箭韶蓋舜樂之總名也今文作簫故先
儒以簫管釋之 又曰樂者象成者也故曰成 條
理猶言脉絡註在始終之中者也蓋樂音不止是金
與玉 獨奏一音則其一音自為始終註此以小成
者言此始終與本文始條理終條理之始終不同本

文主大成言也。本文全主大成集註，乃說一段者，蓋不如是無以顯大成之全。且大成亦不過是集衆小成而已。此解經之法也。小成之始終，只在其一音之內。大成之始終，則通八音而言。如三子之所知所行，只在其一清一和一任之內。如孔子之所知所行，則兼乎三子之清和任也。其說集註已明備。大全所引朱子之說，與此絕不同。蓋前日未定之說也。智者知之所及，註謂知之所到處也。聖者德之所就。

註謂行之結果成就也 智與聖是知行之已成名
目知與行却是用工名目 集註三子之所知偏於
一而其所就亦偏於一也此如衆音之各自為始終
者耳既云偏便只是一音不是三子之小成者亦有
始終條理也 特為衆音之綱紀註不必分大綱小
紀當以首末論 又金始震而玉終詘然也註記聘
義曰其終詘然又小註曰金聲有洪殺始震終細玉
聲則始終如一其聲詘然而已 鑄鍾註鑄大鍾也

俟其既闕

註

闕絕也間也

宣其聲收其韻註聲

與韻不同韻者聲之餘

惟天子建中和之極註按

兒寬傳司馬相如有遺書請武帝封禪上竒其書以

問寬寬對云此帝王之盛節也然享薦之儀不著於

經惟聖王所由制定當非羣臣之所能及使羣臣得

人自盡終莫能成惟天子建中和之極兼總條貫金

聲而玉振之以順承天慶垂萬世之基上然之乃自

制儀采儒術以文焉按寬此言只是避難獻媚之辭

堯舜之智尚稽于衆而不自用今見於二典三謨者
詳矣寬安得為此言乎其曰天子建中和之極云云

寬意亦非專主樂也其詞出于古者則專主樂朱子
所謂疑古樂經之言是也其當時引用之意大槩主
享薦之儀言而樂亦在其中矣若細求古語專主樂
之意則所謂建中和之極者內必根于心氣之和而
有以為五聲六律之主外必正其聲氣之元而有以
致其盡善盡美之道此皆自天子之一身言之然後

兼總樂中之衆條理而始之以金終之以玉也然兒
寬雖知誦此言而其意則可識矣 亦此意也 註謂
亦集大成之意

智譬則巧也 條

此一條亦主孔子言蓋此聖智即上文之聖智若以
上文聖智亦兼三子則三子安得有始終條理特一
音自為始終與本文始終自不同也故斷通主孔子
說而三子之不得為全者自見于言外况三子乃力

有餘而巧不足者孟子分明云其中非爾力也三子
安得為有智耶故註云是以一節雖至于聖而智不
足以及乎時中也又總註云三子之行各極其一偏
獨以行言見其智有未及也 朱子小註曰聖而不
智如水母之無蝦按韻府水母目蝦郭璞江賦水母
有足無口眼大如覆帽腹下有物如絮常有數十蝦
食其腹下涎或捕之則沉乃蝦有所見耳

北宮錡問曰 章舊有一條減二十五字移入下題

諸侯惡其害已也條此條出上題元有一條芟去

集註當時諸侯兼并僭竊故惡周制妨害已之所為也已之所為兼并則班祿之制有妨矣已之所為僭竊則班爵之制有妨矣然兼并必僭竊二者勢實相因

天子一位公一位條第三條出公侯題下

天子一位之位猶言級也 子男同一位猶郎中負外皆五品但未免有正從且使子男序立必子序於

男之上 按王制班爵亦五等子男各一位而無天子一位似王制較長 君一位卿一位止凡六等註云六等施於國中蓋兼王朝與侯國言觀天子之卿受地視侯一段可見不必以無公為泥蓋公在五等之列矣

天子之制地方千里 條 艾 一條

地方千里言其地方有千里也方字帶下猶云正也非謂地方也觀公侯皆方百里文意自見

公侯皆方百里 芟三條減十字

爵祿宜相應如子男同一位則皆五十里公侯異位而封地獨同何也愚按此不但與周禮王制不同據詩經閟宮曰乃命魯公俾侯于東錫之山川土田附庸曰顓臾則在魯地七百里之中又春秋傳管仲對屈完曰賜我先君履東至于海西至于河南至于穆陵北至於無棣亦非止百里矣不能五十里不達於天子附於諸侯曰附庸 補小國之地不足五十里

者不能自達於天子因大國以姓名通謂之附庸而
庸字無解今考庸字只有三解曰用曰常曰功無訓
通者此蓋取常義也謂以附為常也 若春秋邾儀
父之類是也註隱公元年三月公及邾儀父盟于蔑程
子曰附庸之君則稱字同王臣也 自天子之制至
附庸班祿之制通於天下者也自天子之卿以下四
段施之於國中者也又可見上文六等施於國中為兼
王朝言矣蓋班祿既兼王朝班爵不容不兼王朝也

大國地方百里

條減四十五字第三條出下題

徐氏曰大國君田三萬二千畝其入可食二千八百八十人卿田三千二百畝可食二百八十八人大夫田八百畝可食七十二人上士田四百畝可食三十六人中士田二百畝可食十八人下士與庶人在官者田百畝可食九人至五人 按此當以百畝食九人起數百畝食九人則二百畝食十八人二九一十八也四百畝食三十六人四九三十六也八百畝食

七十二人八九七十二也卿祿四大夫大夫八百畝
四箇八百畝則為三千二百畝大夫食七十二人四
箇七十則四七二百八十又零四箇二則為八是為
食二百八十八人也君十卿祿亦以上文計之而已
可食九人至五人註此依末段大文云 府史胥
徒註府治藏史掌書胥徒民服徭役者胥徒亦分為
二周禮天官冢宰府六人史十有二人胥十有二人
徒百有二十人按杜詩云詩聽小胥抄則與徒不同

宜矣

次國地方七十里 芟二條移一條入上題

徐氏曰次國君田二萬四千畝可食二千一百六十人卿田二千四百畝可食二百十六人註以下大夫倍上士上士倍中士中士倍下士者與大國同小國亦同蓋君卿可殺大夫以下不可殺也可殺者損有餘之意也不可殺者護不足之義也故下士與庶人在官者必有九人可無百畝之田以養之乎大夫上

士中士亦然若君卿人數固可損也趙氏註亦如此
云 大國三卿五大夫上中下士各九人次國小國
皆然

耕者之所獲一夫百畝

第三條大文文字舊誤

上中下農田皆百畝而有上中下食之差等者全在
百畝之糞上 一夫一婦佃田百畝註佃治田也

糞多而力勤者為上農註糞多便是力勤也非糞多
自糞多力勤自力勤觀下文云其次用力不齊故有

此五等而不及糞可見如此方與大文契合糞即是人力所為者 朱子曰愚按此章之說與周禮王制不同蓋不可考缺之可也然則朱子之致疑此章云云者明矣然却與周禮分土惟三大國次國小國也者脗合其實不可曉况王制乃漢文帝命諸儒刺六經而作者其言又大半用孟子文可盡據乎朱子雖嘗云畢竟周禮底是然又嘗疑是聖人方起草而未及行蔡九峯亦謂首末未備乃周公未成之書而新

安倪氏因謂冬官之缺蓋其所未嘗筆者故南軒謂當以孟子為正然則有王者作亦不必屑屑於既往之迹而能合先王之意則已矣 黃氏日抄曰集註謂與王制周禮不同而不敢質其說此謹之至也然孟子生周之末詳已不聞漢文帝時作王制果何為而反得其詳漢衰而王制出於王莽家之劉歆恐尤難與孟子較同異也當以孟子之說為主而闕孟子之所未詳

萬章問曰敢問友

挾者兼有而恃之之稱輔氏曰兼夫有與恃之之意方謂之挾但有之而不恃則未謂之挾也

不挾長不挾貴不挾兄弟而友

新安陳氏曰三者之中挾貴尤常情所易犯下文四節皆不挾貴者特舉其不挾貴一節揔是無所挾也挾兄弟而友所謂席父兄之勢為美官者

孟獻子百乘之家也

此條不必以獻子之忘勢與五人忘人之勢相對說
當主獻子不挾貴說蓋獻子所重五人者在於忘人
之勢此正所謂友其德也則獻子之不挾其勢彰彰
矣本文意自明張子註不必拘也小註尤不可信

費惠公曰吾於子思則師之矣條

舉其成語以見其友德而無所挾之意不必以所師
所使皆為友也 入云則入註唐言入公乃入不直
進入也猶不命之坐不敢坐之意其不挾為何如

舜尚見帝帝館甥於貳室

條芟二條減四十八字

此節不可以為此正是承上文言王公之尊賢處盖堯之於舜固能與共天位治天職食天祿然孟子此節本意只在無所挾上故曰是天子而友匹夫也上文所以着箇非王公之尊賢者盖不如此貶之則平公之於亥唐其尊賢為極矣又孰知其為有所未至者耶亦饗舜謂享於舜也故註云堯舍舜於副宮而就享其食盖此食是舜所設者可見迭為賓主之

義 舜尚見帝帝館甥於貳室則舜為賓而堯為主
亦饗舜則堯為賓而舜為主故曰迭為賓主也 以
天子友匹夫迭為賓主恐亦不是對坐 貳室副宮
也註非正宮也

用下敬上謂之貴貴

云 云 芟一條減二十六字

通章是用上敬下止是尊賢其言用下敬上而貴貴
者主意在其義一也 用上敬下不必謂用上之禮
以敬下也只謂以上敬下也用訓以處多如此 摠

註單舉以天子友匹夫者舉重以見輕也

萬章問曰敢問交際何心也章減十七字更定次序

此章之言萬章始終以為當卻孟子始終以為可受
蓋仲尼不為已甚之學而其義之精則在於夫謂非
其有而取之者盜也充類至義之盡也一條觀此
章之言見孟子所學之中正其曰願學孔子良不誣
也不受萬鍾夫豈苟哉萬章問曰卻之為不恭何
哉而孟子曰尊者賜之曰其所取之者義乎不義乎

而後受之以是為不恭果何以為不恭也曰恐其所
取之非義則所以待其上之心薄矣恭安在乎 曰

請無以辭卻之以心卻之云 題 見得上文所謂卻

之者是直以其不義而卻之非宛轉而卻之也 集

註但無以言辭間而卻之大全註間去聲一本作問
皆不可曉按集註無音似順若作去聲讀則間字為
推開之意猶拒也

其交也以道其接也以禮 云 艾一條

殺越人于貨閔不畏死補殺人而顛越之既殺了則將其屍去擲而棄置之耳閔然頑然也

孔子之仕於魯也魯人獵較云

云 減二字

獵較未詳趙氏以為田獵相較奪禽獸以祭張氏以為獵而較所獲之多少也註依趙氏則較在方獵之時依張氏則較在既獵之後趙氏較音角角逐也張氏較音教比較也 獵較本為祭祀故雖俗而不害義趙氏以為田獵相較奪禽獸以祭與下文先簿正

祭器者相叶古人之獵始於為田去害也終以為祭

趙氏說正

獵較猶可而况受其賜乎

獵較庸俗之事孔子且為之况交以道接以禮而受之夫何不可之有哉

事道奚獵較也

減三十八字

大註云事道奚獵較也萬章問也為無曰字而云

事道奚獵較也言獵較豈所以為道乎曰孔子先簿

正祭器云云言亦不妨於事道也曰奚不去也萬章又言如此則孔子亦不得已而為之耳既不得已何不遂去孟子乃言獵較特一事之從俗耳孔子他所為以試其行道之端者固有在矣其所以望於魯者深矣若果畢竟乖所望則亦斷然去之矣

孔子先簿正祭器不以四方之食供簿正

芟一條

夫器有常数食有常品則其本正矣彼獵較者將久而自廢矣註全在彼獵較者將久而自廢矣一句有

力不以四方之食供簿正一國有一國之四方一
邑有一邑之四方不可泥也 為之兆也此句泛說
不可復承上文獵較言故註云孔子所以不去亦欲
小試行道之端以示於人夫小試行道之端以示於
人其事目亦多端矣豈可復滯於先簿正祭器一事
耶 為之兆也亦期於行耳苟不行則去矣故曰是
以未嘗有所終三年淹也 兆足以行即下文所謂
見行可者也

孟子曰仕非為貧也 章減三十一字

此章蓋為當時有為貧而苟祿者發首節言君子之仕本為行道而亦有為貧者第二節為貧者當知所以自處必辭尊而居卑第三節言辭尊居卑之所宜第四節即孔子事以為法例第五節言其所以如此者蓋位卑者無事於言高而居高者必期於行道此其所以只宜辭尊而居卑也

惡乎宜乎抱關擊柝

減一柝字改正行夜二字與上文夜行別

此要見其職易稱之意下文云會計當而已矣牛羊
茁壯長而已矣而已矣字正見其職之易稱也抱
闕擊柝只是一事古人為闕以禦暴而闕之守莫重
於夜大全云柝夜行所擊木也新刊集註云柝行夜
所擊木亦為有理行夜所謂守闕者行夜也如智伯
行水今京師校尉行事之行與

牛羊茁壯長而已矣

改正而且二字相連

言牛羊肥壯而且長益也長蓋謂生息滋繁也不然

茁壯二字已盡况為乘田者必計其所字育無獨取
肥壯之理如今之馬課及犧牲所牛羊決無不課其
所生長者也

位卑而言高止不行耻也

芟二條減二十二字

此為貧者之所以必辭尊富而寧處貧賤也註所以
二字重立乎人之本朝而道不行耻也亦正為為
貧而仕者發或者不察見集註云以廢道為耻則非
竊祿之官遂認與上文作對仗看非也此言其位卑

而無事乎言高若使立乎人之本朝則有行道之責
矣惡可以貧賤自諉耶 大註兩箇以字指辭尊居
卑者言其有見於此所以必辭尊富而寧處貧賤也
萬章曰士之不託諸侯何也 章

士而託於諸侯則為無常職而賜於上矣 此章第
二節言可受餽以餽無常數也 第三節言不可受
賜以祿賜有常數也 第四節言餽之繼必以君命
者為不可 第五節言餽之繼不以君命將之乃可

也 第六節言堯之於舜乃人君養士者之標的也
抱關擊柝者皆有常職以食於上

無常職而賜於上則為士而託於諸侯矣

繆公之於子思也亟問亟餽鼎肉

鼎肉熟肉也鼎非訓熟肉經鼎則熟矣故云

蓋自是臺無餽也

雖知亟拜之勞而不復然不知繼粟繼肉而遂絕不
餽均之為失養賢之道矣

悅賢不能舉又不能養也可謂悅賢乎

悅賢字虛悅賢所重在於舉不徒在於養今繆公之於子思非惟不能舉亦且不能養也安在其為悅賢乎

廩人繼粟庖人繼肉

或問如此則有常數矣曰非也雖云繼肉終喚作餽不喚做常祿

堯之於舜也使其子九男事之

條芟三條

堯之於舜

云

百官牛羊倉廩備以事舜於畝畝之

中必非數數以君命將之而凡所謂廩人繼粟庖人繼肉者皆綽綽乎其有餘裕矣况其後又舉而加之高位則不徒能養而又能舉信乎其為王公之尊賢矣後舉而加諸上位謂上相之位也非天子之位上位猶言高位

萬章曰敢問不見諸侯何義也

章

在國曰市井之臣在野曰草莽之臣皆謂庶人庶人

即士也以位而言曰庶人故徃役義也以德而言曰士故徃見不義也此士字與下文士以旂以士之招招庶人士字不同蓋此士字是未仕者彼二士字是已仕有位者乃上中下士之士也故朱註云士謂已仕者

且君之欲見之也何為也哉云

云

且君之欲見之也何為也哉至則吾未聞欲見賢而召之也所以明上文徃見不義也之意又自此下五

節皆所以申明此一意也無他意也蓋此一意孟子
一生所固執而當時上下所共疑者故孟子因萬章
之問而反復詳言之 為其多聞也以所知言為其
賢也以所行言下文以德則子事我者也德又兼多
聞與賢言 繆公亟見於子思曰古千乘之國以友
士如其詞驕故子思之答其詞抗 古之人有言
曰事之云乎豈曰友之云乎孟子引子思之言直是
峻厲槩是就自己地位上說故其言如此若他士則

不必皆泥此堯之於舜也亦止是友豈必拘於師之
哉他日所謂學焉而後臣之者亦此意 而况可召
與是召之使往見也

齊景公田招虞人以旌不至將殺之

條

不至將殺之言虞人已拚一死也故繼之曰志士不
忘在溝壑勇士不忘喪其元

敢問招虞人何以止大夫以旌

芟一條減四十六字

大註皮冠田獵之冠也事見春秋傳傳曰齊侯田于

沛招虞人以弓不進公使執之辭曰昔我先君之田也旌以招大夫弓以招士皮冠以招虞人臣不見皮冠故不敢進依此則所謂招庶人以旃士以旂大夫以旌者皆是田獵時招但傳云弓以招士此云士以旂不同耳 通帛曰旃出周禮司常 通帛言無他飾也如交龍為旂用帛而加飾也 析羽而注於旗干之首曰旌 註旗干之干與竿同見正韻

以大夫之招招虞人虞人死不敢往

芟一條

即謂齊景公招虞人以旌而不至也以此推之則以士之招招庶人庶人亦不敢往矣此與上文一義皆是不敢往者况乎以不賢人之招招賢人乎則不可往者也

欲見賢人而不以其道

近則就而見之遠則以幣聘之此則欲見賢人而以其道者也舍是而召之則非其道即是欲其入而閉之門此二欲字宜要分明

夫義路也禮門也

自君子而言不必以見賢上言

詩云周道如底

云云 芟二條

周道如底按大東詩小註輔氏曰周道只道路之道與下章周行一意故傳以為東方之賦役莫不由是而西輸於周是即指道路而言也然以上四句平直履視之義觀之則又似指周之王道而言豈本意只是指道路而言而其中亦含此意耶

小人所視

減六十四字湊合

按此註云視視以為法也若以周道為道路而履之
安足為人觀法決然當依義路也意解就道理說方
可起君子所履小人所視縱然詩經本意不如此孟
子引之斷章取義亦當依義路說故集註曰引此以
證上文能由是路之義可無疑也

孟子謂萬章曰一鄉之善士

章莖一條第二條出尚友題下

蓋一鄉中士之善或善於才或善於行或有孝之善

或有弟之善或長於政事或長於文學此諸人各有
所長謂之善士可也謂之一鄉之善士未可也吾惟
有其人之才又有其人之行如孝如弟如政事如文
學之類吾皆能兼而有之則聲應氣求彼此相益必
能盡友一鄉之善士不然無地以納之也 一鄉之
善士一條不必作循序漸進說下文以友天下之善
士為未足蓋自其所造之極而更推一步說非必云
此人自其友一鄉之善士而進至此也

以友天下之善士為未足又尚論古之人 芟一條

又尚論古之人一句兼下文誦其詩讀其書誦其詩
讀其書觀其言也論其世者考其行也 詩指賦咏

而言書指文辭而言此言詩書如今人言詩與文相
似

是尚友也 芟一條減一百八十字末條作既二字舊倒置

此句只承以友天下之善士為未足意不必云上面
一鄉之善士至天下之善士字生來也故大註曰是

能進其取友之道而非止為一世之士矣但上文是已為一鄉之善士然後能盡友一鄉之善士此是言既不止友一世之善士則亦不止為一世之善士矣却不必為善蓋古人恐古人未易盡也如堯舜文武雖孟子亦須祖述憲章之今按朱子所解之意是先言必一鄉之善士乃能盡友夫一鄉之善士推之一國天下皆然然則其能進友古之善士而不止友一世之善士者亦當是不世之善士矣倘非不世之

善士安能不止友一世之善士哉如此則文意方相
照應不然上段是善已蓋一鄉然後盡友一鄉之士
下段是已能盡友古人然後得為不世之善士語意
不相符合姑記所疑以質高明 按朱子所解則孟
子此章之言槩似主成德者言 雙峯之說雖有可
聽然前段所云似欠主張其曰進善無窮已故其取
善也亦無窮已是主一鄉之善士條言也其曰取善
無窮已則其進善也亦無窮已是主以友天下之善

士為未足條言也不知上條作已進善了然後取善
下條作既取善了然後進善是果何說饒氏獨能無
所疑乎

齊宣王問卿章減七字

孟子當時為卿於齊齊王此問蓋亦有為而發其後
孟子言異姓之卿曰君有過則諫反覆之而不聽則
去位亦實理也而亦於王有規焉 此一章大旨明
白然反覆二字最當玩味可見古人之至誠懇惻之

意與後世之姑一言以塞責而遂去者異趣矣 異
姓之卿可去也貴戚之卿君猶可去宗廟不可去也
微子之去又所以存宗廟也 孟子曰貴戚之卿君
有大過則諫而朱子曰貴戚之卿小過非不諫也但
必大過不聽乃可易位所以補孟子之意按紂始為
象箸箕子嘆曰為象箸必為玉盃為玉盃則必思遠
方珍恠之物而御之輿馬宮室之漸自此始不可制
也於是諫紂夫為象箸一事豈便足以亡國邪箕子

以紂親戚亦不肯放過而必諫則朱子之說信矣易
曰履霜堅冰至若必待大過而後諫恐無及也文言
曰由辨之不早辨正謂此也 三仁貴戚不能行之
於紂註蓋三仁固非阿衡之比且紂才智過人威權
自攬此三仁之所以難為權也然使以湯武或孔子
處比干箕子之位必不終於囚死當廢紂而立微子
矣聖人無死地邵康節之言精矣微子之去抑亦有
所嫌耶 霍光異姓乃能行之於昌邑註光雖異姓


然武帝畫周公相成王圖以授之直使輔小主行周公之事則其權已在貴戚之卿之右矣况當時貴戚諸侯王皆不得預朝權光安得獨以異姓之卿自諉乎故凡天下事變不可悉為之預定要當隨時制宜如光之所為是也古云機不可預設變不可先圖

西山真氏一註最宜讀之上云君惡雖未如紂然非可事之君義不當食其祿則魯之叔肸可以為法春秋公弟叔肸卒穀梁曰叔肸賢之也其賢之何也

宣弒而非之也非之則胡為不去也曰兄弟也何去而之與之財則曰我足矣織屨而食終身不食宣公之食春秋貴之 又曰前世人臣固有見君之失姑一言以塞責者曰吾亦嘗諫之云耳諫而不從非吾責也此其用心既欲苟獲爵位又欲厭塞公言張華之所以見屈於張林而不自免也 按綱目趙王倫之變既廢賈后矣執張華於殿前華謂張林曰卿欲害忠臣邪林稱詔詰之曰卿為宰相太子之廢不能

死節何也華曰式乾之議臣諫草具存可覆按也林
曰諫而不從何不去位華無以對遂皆斬之夷三族
閻纘撫張華尸慟哭曰早語君遜位而不肯今果不
免命也 式乾之議 按綱目賈后詐稱帝不豫召
太子適入朝既至置于別室遣婢陳舞以帝命賜酒
三升逼使盡飲之使黃門侍郎作書草稱詔使書之
文曰陛下宜自了不自了吾當入了之中宮又宜速
了不自了吾當手了之太子醉迷遂依而書之字半

不成後補之以呈帝帝幸式乾殿召公卿入以太子
書示之云諸王公莫有言者張華曰此國之大禍
自古常因廢黜正嫡以致喪亂願陛下詳之裴頠以
為宜先校檢傳書者又請比較太子手書



四書蒙引卷十三